

Museo Arqueologico Aruba a confirma cu

## Lugar unda lo construi Ritz Carlton ta sitio Arqueologico

ORANJESTAD(AAN)— Museo Arqueologico Aruba (MAA) tin como meta pa conserva, preserva y investiga sitio- y materialnan arqueologico di Aruba y pa informa y educa publico en general tocante e arqueologia y historia Indigena di Aruba. Mescos cu museonan na tur otro pais na mundo, MAA tin cu traha segun ley. E berdad

ta cu na Aruba te ainda no tin ley cu ta protege nos herencia cultural arqueologico debidamente. Pero tin procedura cu MAA ta sigui pa tog protege nos patrimonio cultural. Esaki kiermen cu MAA entre otro ta duna conseho na - y ta traha hunto cu diferente instancia y departamento di gobierno pa asina yega na

proteccion di e sitioan arqueologico di Aruba cu, a base di investigacionnan haci y criterio specifico, tin mas prioridad. Como ehempel por duna cu asina a logra cu gran parti di e sitio arqueologico na Tanki Flip ta ser conserva. Pa e proyecto aki hasta ta haci uso di entre otro cambio di tereno, pa cual Departamento di



Infraestructura (DIP) ta cooperando cu MAA.

Den cuadro di e plan di ordenanza teritorial, MAA ta duna conseho na DIP y Kadaster tocante ubicacion di sitioan arqueologico y esnan cu tin prioridad di proteccion. Te awor tin 182 sitio arqueologico cu ta conoci na MAA. Den esaki MAA ta haci distincion den importancia y tipo di sitio.

Encuanto e sitio arqueologico situa na e tereno unda Hotel Ritz Carlton lo ser construi, por bisa cu Museo Arqueologico Aruba na diferente ocasion a duna informacion y conseho tocante e sitio arqueologico aki. Tambe a duna conseho y informacion tocante gran parti di e mesun area di "high rise" hotel aki caminda tin mas sitio arqueologico cu ta ser menaza pa construccion di entre otro centronan comercial y condominios. Pero mescos cu na tur otro parti na mundo, no ta museonan tin e ultimo decision.

Proteccion di e herencia arqueologico di Aruba ta tarea di Museo Arqueologico Aruba y responsabilidad di henter comunidad. Gran parti di locual ta 'temporalmente protege' awendia wardando riba e legislacion adecuado a ser haci danki na e sentimento di responsabilidad di instancianan y personanan cu ta haya nan involvi cu material arqueologico riba un tereno.

Den e situacion cu un tereno destina pa construccion tin informacion arqueologico, tin e posibilidad pa saca y documenta e materialnan arqueologico na un forma responsabel, prome cu construccion tuma lugar. Aunke ta prefera cu materialnan arqueologico ta keda den nan contexto, MAA ta haci excavacionnan di emergencia ora no tin e posibilidad pa conserva e artefactonan "in situ". Un ehempel di esaki ta e excavacion di emergencia cu a tuma lugar durante luna di Oktober cu a pasa na Sabaneta, ora cu e compania Hernac NV a encontra material arqueologico mientras trahadornan tabata coba canal pa pasa kabel di Elmar. Den e excavacion di emergencia cu a sigui a logra salba y documenta entre otro algun skelet. E documentacion a ser ehecuta na un forma científicamente responsabel, mientras awor ta procesando e material y informacion. Di e forma aki, aunke a ser construi, a salba informacion hopi balioso cu ta beneficia henter comunidad di Aruba.

Museo Arqueologico Aruba lo sigui traha duro pa proteccion di Aruba su herencia arqueologico. E herencia aki ta un legado pa e generacion aki y esnan futuro cual mester keda parti di nos bida diario, nos identidad y nunca mag bira un instrumento pa fomenta desunion.